

Penggerak Masyarakat dan Masalah Sosial

Oleh

Mohamed Imran Mohamed Taib

HARI ini (12 Nov, 2005), para pemimpin kita akan bertemu untuk membincangkan isu-isu yang sering menghambat kemajuan masyarakat Melayu-Islam Singapura. Pertemuan sebegini amat penting asalkan tujuannya untuk mengenalpasti, memahami, menganalisa dan mengajukan jalan-jalan penyelesaian terhadap masalah-masalah sosial.

Memang tidak dapat dinafikan yang masyarakat Melayu Singapura mempunyai berbagai masalah yang belum selesai. Kita juga sering diperdengarkan atau dikejutkan dengan masalah-masalah baru. Masalah-masalah sebegini seringkali mendatangkan kepanikan moral tanpa rasa kepertanggungjawapan untuk mendiagnosis persekitaran isu, punca dan faktor dengan teliti dan terperinci. Yang ketara, kita mahu terus mencadangkan jalan penyelesaian sebelum memahami setiap isu atau masalah secara mendalam. Jalan penyelesaian ini seringkali berbentuk program atau aktiviti yang keberkesanan jangka panjangnya amat diragukan.

Masalah Melayu?

Pada masa yang sama, sebahagian besar masalah-masalah sosial digembar-gemburkan oleh sebilangan pihak sebagai ‘masalah orang Melayu’ dan seharusnya diselesaikan oleh masyarakat Melayu sendiri. Pemikiran sebegini telah menimbulkan beberapa persoalan. Sejauh manakah masalah ini sesuatu yang eksklusif pada masyarakat Melayu? Selagi kita tidak mempermasalahkan perkara ini, kita akan terus mendengar atau membaca komen-komen yang menuding pada masyarakat Melayu sebagai masyarakat yang bermasalah (*the problematic Malays*).

Sesetengah golongan pula membuat andaian menyeleweng yang bangsa Melayu mempunyai budaya dan perwatakan yang lemah. Sebagai contoh, sekiranya ramai murid Melayu gagal di dalam peperiksaan, faktor rasnya dijadikan sebab – “Oh, Melayu memang malas belajar.” Sekiranya para peniaga Melayu gagal di dalam perniagaan, kita mendengar, “Oh, orang Melayu memang tidak pandai berniaga.” Selalunya, komen-komen sebegini diikuti dengan perbandingan dengan masyarakat lain.

Kesan-Kesan Negatif

Pemikiran-pemikiran sedemikian mendatangkan kesan-kesan negatif yang sukar dileraikan. Sudah pasti pemikiran sebegini akan melemahkan daya saing, menanamkan sikap fatalistik dan melusuhkan jati diri masyarakat. Perkara ini sudah pun terjadi sepanjang era penjajahan yang berlangsung selama lebih tiga ratus tahun. Mereka yang melaung-laungkan faktor budaya, baka dan perwatakan bangsa pada masalah-masalah sosial sebenarnya menunjukkan minda yang masih dijajah oleh ideologi kolonialisme. Ianya

menjadi lebih rumit sekiranya yang melaung-laungkannya tergolong daripada para penggerak masyarakat seperti pemimpin-pemimpin di pertubuhan-pertubuhan sosial, elita budaya, politik dan agama, serta golongan inteligentsia yang berpengaruh di dalam bidang-bidang tertentu.

Sebenarnya, pemikiran-pemikiran menyeleweng seperti ini pernah disanggah dengan keras oleh Professor Syed Hussein Alatas di dalam tulisan-tulisan beliau seperti *Mitos Pribumi Malas* dan *Sekitar Revolusi Mental dan Peribadi Melayu*. Sayangnya, para penggerak masyarakat Melayu sendiri kurang memberi perhatian pada tulisan-tulisan beliau. Akibatnya, masalah-masalah yang melanda masyarakat kita sering disalahkan pada faktor-faktor dalaman sahaja. Ianya seolah-olah masalah-masalah ini sebatu dalam masyarakat Melayu. Oleh itu, jalan penyelesaian yang diajukan bersifat sementara dan superfisial.

Sejauh manakah para penggerak masyarakat kita mampu meletakkan masalah-masalah perceraian, keciciran pelajaran, pengangguran dan sebagainya di dalam rangka permasalahan yang lebih luas? Dapatkah penggerak-penggerak masyarakat kita mengetengahkan faktor-faktor kesinambungan sejarah dan politik perkauman? Sebagai contoh, yang sering kita dengar ialah faktor-faktor seperti kurangnya didikan ibubapa, kurang pengetahuan agama dan perwatakan yang lemah. Faktor-faktor yang lebih luas seperti masalah struktur dan susunan masyarakat yang dilandaskan atas ideologi tertentu sehinggakan terjadinya masalah keterasingan tidak pernah dipersoalkan. Jarang juga kita didedahkan pada faktor pengalihan mendadak (*sudden displacement*) dan mobilitas sosial yang pantas (*rapid social mobility*) yang mengakibatkan keresahan secara meluas sehinggakan timbul masalah-masalah lain seperti kehilangan makna dan orientasi hidup.

Tanggungjawab Penggerak Masyarakat

Oleh itu, amatlah dikesalkan sekiranya masalah-masalah seperti perceraian, pengangguran, kemiskinan, kenakalan remaja dan sebagainya hanya dilihat dari lensa perkauman. Sebaliknya, kita harus meletakkan masalah-masalah sebegini di dalam rangka nasional supaya jalan penyelesaiannya lebih menyeluruh. Di samping itu, kita juga tidak akan dibelenggu oleh masalah sumber yang terhad. Masalah yang melanda masyarakat Melayu juga merupakan masalah nasional kerana kita tidak terlepas daripada ikatan identiti nasional kita sebagai warga negara Singapura.

Jika dipandang dari sudut ini, para penggerak masyarakat kita haruslah menumpukan perhatian yang lebih terhadap pembangunan intelektual mereka. Kita dapat berbangga dengan semangat aktivisme dan komitmen mereka terhadap kemajuan masyarakat dan negara. Pada masa yang sama, para penggerak masyarakat haruslah juga melengkapkan diri dengan ilmu-ilmu kemasyarakatan. Ini amat penting memandangkan posisi mereka sebagai pemimpin yang bertanggungjawab untuk mendidik masyarakat. Para penggerak masyarakat yang tidak faham akan struktur, proses dan mekanisme sosial tidak akan dapat mengajukan persoalan-persoalan yang relevan serta mencadangkan jalan-jalan penyelesaian yang jitu. Di samping itu, mereka juga tidak akan dapat mengantisipasi masalah-masalah baru yang akan muncul akibat perubahan-perubahan sosial dan kondisi masyarakat. Inilah beban penggerak masyarakat yang harus kita ketengahkan di samping membincangkan masalah-masalah sosial yang hanya merupakan tanda (*symptom*) kepada masalah yang lebih besar lagi.

*[Artikel ini telah disiarkan di Berita Harian pada 12hb November 2005 dengan tajuk 'Perluas Minda
Kenal Pasti Punca Masalah Melayu']*